


特別  
18  
3414  
11





門 18  
號 3414  
卷 11

御訂全金詩增補中州集卷三十七

金元好問原本

高轉運德裔 一首

德裔字曼卿鶴野人高才博學弱冠擢第  
累遷登聞檢院同知太府少監平陽少尹  
開州刺史豐王傅卒於西京路轉運使工



全金詩卷三十一  
於爲文字畫尤有法所題卷軸今猶有存者嘗以樗軒所書比之氣韻形似無毫髮少異樗軒自望者甚高何至學曼卿乃暗合之真異事也子元道殿中侍御史

坐忘女

女環州張氏年十三異夢之後坐忘已四年矣贈詩者甚多

結習銷來性自圓去留元不閒人天消搖自是忘形蝶枯寂寧同委蛻蟬無礙真空常蕩蕩若存餘息尚綿綿立亡坐脫皆遊戲定力何嘗有變遷

路冀州仲顯

一首

仲顯字伯達冀州人家世寒微其母有賢行教伯達讀書國初賦學家有類書名節事者新出價數十金大家兒有得之者輒私藏之母爲伯達買此書搏衣節食累年而後致戒伯達言此書當置學舍中必使同業者皆得觀少有靳固吾卽焚之矣伯達正隆五年進士明昌初授武安軍節度

使鄉人榮之雲朔用兵伯達奉使江左還  
獻賜幣以佐軍未報而伯達死章廟詔以  
所獻還其家夫人傅氏曰此非吾夫意復  
上之有司不聽夫人副之州學買上田二  
千畝有奇以贍生徒故相馬琪德玉時判  
州事聞於朝賜號成德夫人伯達二子鐸  
字宣叔鈞字和叔俱有名於時宣叔爲諫  
官諫章廟元妃李氏出細微不應上僭有

累聖德又其兄弟恃寵納賂將有楊國忠  
之禍坐謗訕除名宣叔布衣還鄉里傅夫  
人臨終敕宣叔曰汝以憂國愛君故極言  
直諫天子明聖特暫有所蔽計他日必復  
起汝前事須再言勿有所顧藉也墓碑不  
之載故表出之

楊祕監釋迦出山像

自從此老出山隅惱亂蒼生底事無他日若逢楊

處士只教畫箇涅槃圖

張代州大節 一首

大節字信之五臺人天眷中進士與興陵  
有藩邸之舊愛其真淳甚倚重之歷橫海  
軍節度使咸平大興尹吏部尚書河東北  
路兵馬都總管明昌初請老特授鴈門節  
鉞除其子巖叟忻州刺史以榮其歸信之  
好獎進士類滄州徐躉大原王澤大興呂  
造經其指授卒成大名士論以風鑒歸之

全金詩卷三十一  
四  
巖叟字夢弼亦第進士歷嵐潞懷三州節  
度終於集慶軍屏山謂吏事不及乃父而  
以長厚見稱子待舉臺掾選授奉御正大  
末從車駕東狩不知所終孫紹祖在東平  
同新進士呂子成輩宴集狀元樓

鸚鵡新班宴杏園不妨老鶴也乘軒龍津橋上黃  
金榜三見門生是狀元

趙轉運慤

三首

慤字叔通黃山先生颯之父也宋末汪彥  
章任鄆州教官叔通爲學正嘗預酬唱故  
其詩文皆有源委國初登科仕至同知南  
京路轉運使事

擬古

春風動地來依依燒痕青王孫行不歸離恨何時  
平翩翩誰家兒曉獵開紅旌彫弓插白羽怒馬懸

朱纓圍合意氣雄  
廝養厭庖烹人生一春草時至  
何足榮君看五陵樹日莫悲風生

蜀山曉發

曉發蜀山道山深人自迷  
殘星數徽小斜月一梳  
低隔舍縲車響遙林杜宇啼  
區區事行役何日得安棲

寒齋雪中書呈許守

剪水作花開紛紛天上來  
聲清偏傍竹艷冷欲欺

梅積潤滋牟麥餘膏丐草萊  
窮欄休歎息數日是春回



郭祕監長倩 一首

長倩字曼卿文登人皇統丙寅經義乙科  
仕至祕書少監兼禮部郎中修起居注與  
施朋望王無競劉巖老劉無黨相友善所  
撰石決明傳爲時人所稱有崑崙集傳於  
世子天驥

義師院叢竹

南軒移植自西壇瘦玉亭亭十數竿得法未應輸

金鑑詩卷三十一  
老柏植根兼得近幽蘭雖無穠艷包春色自許貞  
心老歲寒百草千花盡零落請君來向此中看

郭錄事用中 一首

用中字仲正平陽人大定七年進士歷浮  
山簿陝州錄事卒年三十一有寂照居士  
集郝子玉毛牧達鄭仲康爲之引其賦醋  
魚云身卧不知雲子白氣酣聊作木奴酸  
按博物志西羗仲秋日取鯉子不去鱗破  
腹以赤秫米飯鹽醋合糝之逾月則熟謂  
之秋鮓故仲正云然又賦雪云灞橋柳絮

人千里楚澤蘆花水半扉殊有詩人思致  
恨不假之以年耳

偶得

叅徧叢林嬾出游指端孤月照高秋大千界裏閒  
窺掌不二門中暗點頭埽地燒香聊自遣栽花種  
竹儘風流蒙莊抵死談齊物無物齊時也合休

趙太常之傑

三首

之傑字伯英大定人本名宗傑避諱改大  
定十六年進士歷西京提刑副使棣州防  
禦使終於太常卿使宋還言事云宋人文  
敝之極且脆弱不足爲慮邊部爲可慮也  
其前識如此子繪名進士早卒孫季卿在

燕中

**附**楊奐跋趙太常擬試賦後金大定中君

臣上下以淳德相尚學校自京師達於郡國專事經術教養故士大夫之學少華而多實明昌以後朝野無事侈靡成風喜歌詩故士大夫之學多華而少實上病其然也當泰和丙寅春二月二十五日萬寧宮試貢士總兩科無慮千三百輩上躬命賦題日日合天統侍臣初甚難之而太常卿北京趙公適充御前讀卷官獨以爲不難

卽日奏賦議乃定旣而中選者纔二十有八人僕時甫冠獲試廷下而席屋偶居前列朝隙聞異香出殿櫺閒一紫衣顧予起問題之難易及名氏里貫年齒而去少顧復相慶曰適駕至矣薄莫出宮傳以爲希遇嘗退而志之後四十五年僕以河南漕長告老於燕過太常之孫承祖家得所擬賦感念存歿不能不惘然爲叙其末并以

舊詩歸之所謂月淡長楊曉色清天題飛  
下寂無聲南山霧豹文章在北海雲鵬羽  
翼成玉檻玲瓏紅露重金爐縹緲翠烟輕  
誰言半夜曾前席白日君王問賈生者是  
余少作也無可取以其紀一時之事庶附  
趙氏家傳或見於後世云

許道寧羣峯莫雪

道士平生林野人醉中拈出雪峯真爲君療却烟

霞癖比似青囊藥更神

題濟源龍潭寺

樹圍修竹竹圍庵庵下泓然碧一潭極目荷花半  
秋色小橫圖上看江南

除夜

日月不肯留歲曆倏去畢僧坊見節物新正在明  
日夜半撫枕歎半百又加七形骸念念改膂力能  
不失經言男數八此去才有一健者未可期况乃

全金詩卷三十一  
常衰疾物情忌盈滿君子慎名實行矣安退閒吾  
其保終吉

趙轉運鼎

一首

鼎字德新樂城人大定十六年進士喜作  
詩頗知道學屏山所許如此仕至西京路  
轉運使元日詩云拜嗟筋力隨年改飲覺  
屠蘇到手遲惜不多見也子中立字正卿  
第進士文譽甚著

宿來同堡

渭北洮南過却春窮邊冰雪更愁人來同驛裏題

詩處破屋青燈一病身

田轉運特秀 一首

特秀字彥實易縣人大定十九年進士仕  
至太原轉運使喜作詩爲周德卿李之純  
所賞感興云散木不材寧適用虛舟無意  
任隨流百年身世槐安國千古人情羹頡  
侯賦古塔云締構百年人換世消沉千古  
鳥盤空他類此彥實所居里名半十行第  
五以五月五日生小字五兒二十五歲鄉

府省御四試俱中第五年五十五八月十  
五日卒造物之戲人如此

五月五日生者  
見其賦集序胡

國瑞  
云

### 宿萬安寺

長途鞍馬倦黃塵喜見空巖萬疊雲漫漫野煙迷  
去鳥蕭蕭林葉帶殘曛苔封老檜龍鱗起石礙流  
泉燕尾分夜敞松窗耿無寐一庭蘿影月紛紛

### 趙漕副文昌 一首

文昌字當時陵川人仕至京兆轉運副使  
嘗有詩云蟲聲連壞壁樹色入秋窗草香  
花落處山黑雨來時頗爲黃華所稱

### 歌扇

媚娘巧作貫珠喉畫扇團團半掩羞唱到春山小  
顰處一輪明月爲花愁



路轉運忱 一首

忱字子誠平郭人大定二十二年進士累  
遷監察御史終於河東北路轉運副使

秋懷

落日留虛壁秋風急戍樓高歌鬼神夜揮涕虎狼  
秋豪貴少青眼文章多白頭何時挂長劍天地一  
扁舟

高密州公振 一首

公振字特夫正隆初進士歷南京留幕終  
於密州刺史詩有家學賦南園江鄉有翠  
蓋紅粧無俗韻綠陰青子更多情之句惜  
不多見也

裴氏西園

簿領沉迷倦不禁偶從名勝此幽尋竹陰疎處見  
潭影人語定時聞鳥音陳迹謾留千古恨歡遊聊

金鑑詩卷三十一  
慰十年心多情一片梁園月送我垂鞭出上林

張轉運穀

一首

穀字伯英臨潁人大定二十八年進士仕  
至河南路轉運使家多法書名畫古物祕  
玩周秦以來鏡至百餘枚他物稱是天性  
孝友與人交極誠款古所謂博雅君子者  
伯英可以當之弟穀字伯玉美風儀善談  
論氣質豪爽在之純希顏伯仲閒舉進士  
有聲場屋及再上不中卽拂衣去嘗自言

丈夫子娶非尚主官不徒步之宰相不屑  
可也宰相李公仲修適之皆與之遊從不  
敢以布衣諸生處之家既貴顯厚於奉養  
擊鮮爲具賓客日滿門窮晝竟夜卒以樂  
死嘗賦雪云樵皮雙鳧懶漁蓑一蝟拳醉  
後云日日飲燕市人人識張鬚西山晚來  
好飲酒不下驢賦畫石云腹非經笥口不  
肉食胸中止有磊磊落落百千萬之怪石

興來茹噎快一吐將軍便欲關弓射氣母  
忽破碎物怪紛狼籍有時醉狂頭插筆寫  
盡人間雪色壁其顛放如此

**補**歸潛志張運使穀字伯英許州人少擢  
第以謹愿純厚著名嘗爲監察御史言奸  
臣紇石烈執忠事士論壯之後以母喪歸  
居許之西城有園圃號小斜川花木泉石  
隱然一佳處公日在其閒行吟坐嘯客至

一觴一詠盡歡襟韻條然君子儒也尋判  
隰州刺史召爲戶部郎中同知河南府遷  
平陽路轉運使卒公蒞官以廉俸祿未嘗  
妄糜布衣蔬食泊如也性友愛弟毅才高  
相與甚懽所蓄稱其所用獨好收古人器  
物所在購求藏古鏡尤多其樣製不可徧  
識字畫勁古有顏平原風詩學黃魯直格  
嘗贈余先子詩云丘垤孰與南山尊公卿

皆出山翁門遺文人共師夫子陰德天教  
有是孫問禮庭中新有桂忘憂堂下舊多  
萱人間樂事君兼有歌我新詩侑壽樽此  
斜川時事也赴隰州被召時又寄詩有句  
云溪口急流裁燕尾山腰世路轉羊腸到  
郡蒞官才九日過家上塚正垂楊

石淙

天后離宮在崧山曲河卽東坡爲韓子華賦詩處也

潁水洗餘高士耳是非猶恐污人牛區區武媚何

爲者水上摩崖紀宴游

宗御史端修 一首

端修字平叔一字伯正汝州人大定二十  
二年進士衛紹王避世宗諱改宗爲姬而  
天下止以宗平叔目之好學喜名節操履  
端勁慕司馬溫公之爲人自爲諸生時見  
者必悚然敬之明昌中自省掾拜監察御  
史車駕東狩是歲大寒人有凍死者平叔  
諫止之元妃兄弟李喜兒輩干預朝政平

叔上書以遠小人爲言道陵知其爲喜兒發詔喜兒就問卿欲朕遠小人小人爲誰其以姓名對平叔奏小人止李喜兒兄弟耳喜兒以聞李氏兄弟皆被切責竟以訐直貶官平叔自守愈篤是是非非議論一出於正大爲朝廷所知降詔褒諭以全州節度副使卒官平叔妻死不更娶潔居二十年士論高之永寧游彥哲調汝州司候

將之官問爲政平叔言爲政不難治心養氣而已彥哲不領明日復來云夏初入官且臨先生鄉郡請問從政而先生乃以治心養氣爲言思之不能得願終教之平叔曰子寧不知此耶治心則心正心正則不私養氣則氣平氣平則不暴不私不暴爲政之術盡於此矣平叔墓碑及傳閒閒公爲作稱其剛稜疾惡有鐵面陳了翁之風

人不以過云姪孫汝作正大未保山棚有  
功入守汝州力盡城復陷兵人欲降之不  
屈而死

漫書

冷面宜教冷眼看只慙索米向長安陰崖何限枯  
松樹望見屏幃盡牡丹

**附**趙秉文舉道齋記余七歲知讀書十有  
七舉進士二十有七與吾姬伯正父同登

大定二十五年進士第厥後余調安塞主  
簿遷邯鄲唐山令是時年少氣銳急簿書  
稱賓客舞智以自私攘名以自尊益無非  
爲利之學而吾伯正父心平氣和以撫循  
其下養孤兄弟之子如其所生年四十餘  
喪其配遂不復娶若將終身焉及任監察  
御史危言讜論瀕死而不顧是其果有大  
過人者豈真有道者耶他日余問道於伯



正父伯正父曰余何知道余但日食二升  
米終歲製一縕袍日旦入局了吾職不敢  
欺賓客慶弔之外課子孫讀書而已余何  
知道在他人乃尋常日用事而伯正父行  
之乃有超然不可及者非有道者能之乎

張戶部翰

五首

翰字林卿秀容人大定二十八年進士爲  
人有蘊藉如素宦然累遷監察御史翰林  
直學士貞祐初戶部侍郎車駕南渡出爲  
河平軍節度使召拜戶部尚書草創之際  
經費空竭雖米鹽細物皆倚之而辦予嘗  
見於戶曹邠州一書生言時事相與詰難  
凡數十條率不思而對雖反復計度者亦

自不能到信通濟之良材也宣宗旦莫相  
之會卒年五十五弟脩字飛卿承安五年  
進士同知河東北路兵馬都總管事猶子  
天彝字仲常黃裳榜登科子天任字西美  
近侍局副使死於宋州之變

贈石德固

西湖之月清無塵橘中之樂猶避秦向來所見止  
此耳渠亦豈是真知津如君眼孔乃許大萬事副

之塵甌墮兒能詩書又肯播著脚世閒看踏破青  
巾玉帶桃李花日斜空望紫雲車布衣誰識隱君  
子一馬癯然何處家

再過回公寺

山州風土極邊頭二十年中復此遊青鬢已隨人  
事改碧溪猶繞寺門流輕寒剪剪侵馳褐小雪霏  
霏入蜃樓爲問勞生幾時了不成長抱異鄉愁

萬寧宮朝回

宿雨初收變曉涼宮槐恰得幾花黃鵲傳喜語留  
鞞尾泉打空山輓鞠場已覺雲林非俗境更從衣  
袖得天香太平朝野歡娛在不到蓮塘有底忙

奉使高麗過平州館

昨日龍泉已自奇一峰寒翠壓簷低兼并未似平  
州館屋上層巒屋下溪

金郊驛

山館蕭然爾許清二更枕簟覺秋生西窓大好吟

詩處聽了松聲又雨聲

李好復 二首

好復字仲通安喜人明昌二年進士榆次  
令有能聲入爲警巡使嘗以事縛一護衛  
道陵有投鼠之喻出爲歷城令終於滑州  
刺史

邵智夫同游南城

園林晴晝蔚如烟林外支流盡水田落日趁墟人  
已散鷺鷥飛上渡頭船

雨中與客飲

門外平橋一水分  
數聲漁唱隔溪聞  
暖風落絮絮飄香  
雪小雨沾花濕夢  
雲釀具未甘名長  
物詩壇聊欲張吾  
軍相逢莫惜通宵  
飲明日閒身不屬  
君

楊祕監邦基一首

邦基字德茂大定中進士仕至祕書監禮部尚書文筆字畫有前輩風調世獨以其畫比李伯時云

墨梅

粉蝶如知合斷魂  
啼粧先自怨黃昏  
花光筆底春風老  
寂寞嶺南烟雨痕

**附**金史本傳邦基字德懋華陰人父絢宋

末爲易州州佐宗望伐宋蔡靖以燕山降  
易州卽日來附絢被殺邦基年十餘歲匿  
僧舍中得免旣長好學天眷二年登進士  
第調灤州軍事判官遷太原交城令以廉  
爲河東第一召爲禮部主事大定初除刑  
部郎中改太府少監知登聞檢院爲秘書  
少監遷翰林直學士再遷秘書監兼左諫  
議大夫修起居注中都警巡使出爲同知

西京留守事徙山東東路轉運使永定軍  
節度使大定二十一年卒邦基能屬文善  
畫山水人物尤以畫名當世云

**附**金詩紀事案中州集以邦基爲大定中  
進士而史復云天眷二年登第相去幾四  
十年不應懸絕乃爾且名氏相同皆曾官  
祕書監官禮部皆善畫定非二人史叙其  
歷官始末甚詳恐中州集所稱官禮部尚

全金詩卷三十八  
書卽史所稱主事之誤大約當以史爲斷也且燕山降金事在宋宣和七年卽金之天會三年也是時邦基年已十餘歲若至大定中始舉進士則年逾六十亦未必晚達如此

御訂全金詩增補中州集卷三十八

金元好問原本

呂陳州子羽

四首

子羽字唐卿大興人大定末進士仕至陳州防禦使元光末爲酷吏所誣以乏軍興繫獄比赦至唐卿自縊死朝臣有辨其寃

者詔復官希顏爲制辭云毀譽之來在仁  
賢而不免是非之論至久遠而乃公人謂  
唐卿於此語爲無媿屏山故人外傳呂氏  
自國朝以來父子昆弟凡中第者六人以  
六桂名其堂貞幹字周卿尤自刻苦酷嗜  
文書著竭石志數十萬言皆近代以來事  
迹幽隱譎怪詼諧嘲評無所不有在史館  
論正統獨異衆人謂國家止當承遼大忤

章廟旨謫西京運幕量移北京致仕自號  
虎谷道人晚年感末疾又號呂跛子自作  
傳以見志閒閒公亦以爲篤志君子也弟  
士安字晉卿卿雲字祥卿子鑑字德昭皆  
名士唐卿其從子云

**補**歸潛志呂陳州子羽字唐卿大興人少  
爲名進士擢第南渡爲左司郎中坐事免  
官後同知開封府遷陳州防禦使時軍旅



數興戶口逃竄公因以實聞於朝而小人  
李煥以爲不憂國失軍儲下吏當死公耻  
之縊於太康驛後朝庭知其無罪復其官  
公入仕以能稱讀書爲文有士大夫風致  
死非其罪天下傷之

廣平道中

風色著鰲面霜華侵老鬚昏埃埋故驛積雪縞修  
途凍岫新詩句寒林古畫圖夜寒孤月上天地一

冰壺

宿章義廣勝寺

小邑本無事我來勞簡書路長頻問馬人靜厭烹  
魚鐘冷僧參外燈殘客夢餘此心誰領會松月夜  
窓虛

至日

歲晏多風雪官閒深屋廬小詩窮則變美酒數斯  
疏未草歸田賦空翻引睡書窓明添眼力已覺日

光舒

李白醉歸圖

春風醉袖玉山頽  
落魄長安酒肆迴  
忙煞中官尋不得  
沉香亭北牡丹開

趙鹽部文昌一首

文昌字公權平陽人明昌二年進士仕至  
遼東路鹽使博學好持論周常山甚愛之  
子觀字維道從事史院資謹厚不忤於物  
閒閒許其字畫進進不已可到古人云

軍中寄親舊

軍中從事鬢絲垂把釣江湖與願違  
紅葉關河爲客久  
黃花時節寄書稀  
霜天不盡孤雲遠  
秋意無

聊一鴈飛鄉社故人應念我豈知南望更依依

韓內翰玉 二首

玉字溫甫其先相人五世祖繼寧仕石晉  
爲行軍司馬從出帝北遷居析津曾孫知  
白仕遼爲中書令孚爲中書門下平章事  
賜田盤山遂爲漁陽人曾祖錫字難老仕  
國朝以濟南尹致仕溫甫明昌五年經義  
詞賦兩科進士入翰林爲應奉應制一日  
百篇文不加點又作元勳傳稱旨道陵歎

曰勲臣何幸得此家作傳耶泰和中建言  
開通州路水漕渠船運至都陞兩階授同  
知陝州東路轉運使事大安三年都城受  
圍夏人連陷邠涇陝西安撫司檄温甫以  
鳳翔總管判官爲都統府募軍旬月得萬  
人藉秦州場買馬官香及鳳翔冒買馬七  
百寶雞埋沒官鐵他州郡弓弩數千以給  
軍出屯華亭與夏人戰敗之獲牛馬千餘

時夏兵五萬方圍平涼又戰於北原夏人  
疑大軍至是夜解去當路者忌其功驛奏  
温甫與夏寇有謀朝廷疑之使使者授温  
甫河平軍節度副使且覘其軍先是華州  
李公直以都城隔絕謀舉兵入援而温甫  
恃其軍爲可用亦欲爲勤王之舉乃傳檄  
州郡云事推其本禍有所基始自賊臣貪  
容姦賂繼緣二帥貪錮威權旣止夏臺之

師旋致會河之敗又云齊魏以高壘爲能  
堅蒲絳以穿空爲得計裹糧坐費盡膏血  
於生民棄甲復來竭資儲於國計要權力  
而望形勢連歲月而守妻孥又云命令不  
至京師奈何眇眇四集之師懸懸半歲之  
上人誰無死有臣子之當然事至於今忍  
君親之弗顧勿謂百年身後虛名一聽史  
臣只如今日目前何顏以居人世公直一

軍行有日矣將佐違約國朝人不從者  
輒以軍法從事京兆統軍便謂公直據華  
州反遣都統楊珪襲取之皆置極刑公直  
曾爲書約温甫温甫不預知其書乃爲安

撫所得

公直書三一與京兆宣撫一與温甫一與楊珪故京兆軍得因書襲

華州及使者覘温甫軍且疑預公直之謀卽

實其罪温甫赴官道出華州被囚死於郡  
學臨終書二詩壁閒士論寃之温甫先賦

怪松云昂藏殊未展偃僂旋自縮惜爾雲  
外姿耐此胯下辱又云木高衆必摧地厚  
敢不跼河中皆汎汎澗底自鬱鬱未幾被  
禍人以爲讖云子不疑字居之小字錦郎  
以父死非罪誓不祿仕丙申之夏過予冠  
氏出其父臨命時手書云此去冥路吾心  
皎然剛直之氣必不下沈兒可無慮世亂  
時艱努力自護幽明雖異寧不見爾子爲

之惻然

**補**歸潛志韓府判玉字溫甫燕人少讀書  
尚氣節擢第入翰林爲應奉文字後爲鳳  
翔府判官大安中北兵圍燕都夏人連陷  
邊城陝西帥府檄溫甫爲都統募軍得萬  
人出屯華亭與夏人戰敗之而溫甫毅然  
有勤王志因移檄關中言詞忠壯聞者感  
動其檄中有云人誰無死有臣子之當爲

然事至於今忍君親之弗顧勿謂百年身  
後虛名一聽史臣只於今日目前何顏再  
居人世王侯將相寧有種乎富貴功名當  
自致耳或誣溫甫以有異志收鞫死獄中  
士大夫憤惜

臨終二詩

客自朝那戍東過古鄭原衰年會凶運奇禍發流  
言白骨將爲土青蠅且在樊仰呼天外恨沉思地

中冤母喪半途鬼兒孤千里魂此心終不滅有路  
訴天閻

天下無雙士軍中有一韓才名兩相累世道一何  
難旅次窮冬莫囚孤永夜寒身亡家亦破巢覆卵  
寧完矍鑠鞍仍在驚呼缺屢彈丈夫忠義耳無惜  
感歌還

王都運擴 一首

擴字充之永平人明昌五年進士累遷同知德州防禦使事山東饑詔馳驛赴官且以賑貸事副之時棣州饑尤甚而不在發粟之數克之擅開倉救之朝廷不之罪也泰和七年夏旱充之以監察御史受詔審冤因爲同列言往時審冤一切以末減爲事至殺人者之罪亦貫出之地下之冤當



誰理之乎使還言初設三司不便大畧言  
三司之設特以刻剝爲事大定間一曹望  
之爲戶部天下倉廩府庫皆實百姓無愁  
怨之聲存乎其人不在改官稱也今三司  
官皆戶部舊員掾屬亦戶曹舊吏豈有愚  
於戶部而智於三司者乞復戶部之舊無  
駭民聽可也崇慶初遷河東北路按察僉  
事上書言時病四一將不知兵二兵不可

用三事不素定四用人違其長貞祐二年  
太原受兵充之之功爲多最後權陝西西  
路轉運使行六部尚書前政太原喬世權  
子實燕人趙伯成子文號爲稱職充之表  
表自見雖處細務亦有法掾屬奔走從事  
無敢後者評者爲子實寬緩欲爲不忍欺  
子文慎密欲爲不能欺皆未必能然獨王  
公之不敢欺爲有徵云年六十三致仕卒

子元慶字善甫歸德行六部郎中次子元亨

題神霄宮清心軒

紛紛百慮自心生方寸清來百慮平未了此心私自笑更憂時世欲澄清

趙吏部伯成 三首

伯成字子文宛平人明昌五年經義詞賦兩科進士博通書傳有真積之力性沉厚言必中理從在太學日人以趙骨鯁目之累遷侍御史拜中丞陝西西路轉運使靜難軍節度使哀宗卽位召爲吏部尚書坐爲飛語所中罷官卒於崧山中潞人宋文之說其臨終甚明了也

蠟梅二首

凍蕾含香臘點勻古來幽谷有佳人詩家只怨和  
羹晚不道紅梅別是春

冷艷疎香寂寞濱欲持何物向時人東風自是清  
狂手辦作竹籬茅舍春

元弟以所業見投賦詩爲贈

者舊隔存歿爲君重歎嗟人門得稽紹文賦見張  
華夙有凌雲筆方乘犯斗槎忘年卽吾友未可論

通家

梁錄事仲新一首

仲新字良輔朝城人明昌五年進士初試  
仙掌承露詩主司以為擅場用是知名卒  
於許州錄事

江天莫雪圖

南雪不到地霏霏滿竹樓沙河燈市裏春在木綿  
裘

二  
三  
四  
五  
六  
七  
八  
九  
十  
十一  
十二  
十三  
十四  
十五  
十六  
十七  
十八  
十九  
二十

盧待制元一首

元字子達玉田人父啓臣字雲叔第進士  
仕宦亦達自號湏水先生和趙元發劉師  
魯葛藤韻云乳兔生長角麀湯結厚冰木  
終成假佛髮不礙真僧莫認指爲月須明  
火是燈拈花微笑處只記老胡曾子達幼  
而敏惠年未二十試於長安爲策論魁擢  
第後又中策魁明昌初章廟設宏詞科命

公卿舉所知子達與郭黻周詢張復亨就  
試凡七日並中選遂入翰苑累遷至待制  
二兄長庸弟曾名進士又俱擢高第時人  
以燕山竇氏比之屏山故人外傳云爾子  
安字希謝翔字仲升仲升正大末登科

閒詠

天近蒼龍闕居連白馬堂松聲得鄰舍山色出宮  
墻巷陋輪蹄少庭閒日月長九衢紅霧裏亦有白

雲鄉

太常卿石抹世勣 一首

世勣字晉卿承安中進士終於禮部尚書  
子嵩字企隆應奉翰林文字父子皆死蔡  
州之難

**補**歸潛志石抹翰林世勣字晉卿契丹人  
少有詞賦聲擢第讀書爲文有體致南渡  
爲左司郎中坐事免久之爲禮部侍郎司  
農太常卿翰林侍講學士從末帝東征至

全金詩卷三十八  
十一  
蔡州城陷死有子嵩企隆

紙鳶

鴟鳶鵬鷲誰雌雄假手成形本自同  
果物戲人人戲物爲風乘我我乘風  
扶搖漫擬層霄上高下都歸半紙中  
兒輩嗷嗷方佇目豈知天外有冥鴻

范滑州中一首

中字極之大興人承安中進士累官京西路司農少卿滑州刺史好賢樂善有前輩風流貞祐中高琪當國專以威刑肅物士大夫被摺撫者笞辱與徒隸等醫家以酒下地龍散投以蠟丸則受杖者失痛覺此方大行於時極之有戲云嚼蠟誰知味最長一杯卯酒地龍香年來紙價長安貴不



重新詩重藥方時人傳以爲笑極之嗜讀  
書一以資於詩詩亦往往可傳壬辰卒於  
京師年五十七

贈韶山退堂聰和尚

郎當舞袖少年場線索機關似郭郎今日棚前閒  
袖手却教鼓笛看人忙

趙禮部思文 六首

思文字廷玉永平人明昌五年進士貞祐  
中陷沒都城閒關南渡遂爲朝廷所知歷  
虢州刺史汝州防禦使金安集慶兩軍節  
度使召拜禮部尚書壬辰卒官爲人誠實  
樂易自少日有君子長者之目南狩以後  
趙吏部子文楊禮部之美趙禮部周臣陳  
司諫正叔與庭玉皆完人終始無玷缺者

也弟庭珪同榜登科三子敬叔介叔方叔  
今居鄉里

**補**歸潛志趙尚書思文字庭玉中山人與  
其弟庭秀庭直皆進士公少擢第爲省掾  
從完顏福興守燕都福興死奔詣南京行  
宮擢侍御史出爲汝州防禦使遷集慶軍  
節度所在鎮靜吏民賴之公暇以詩酒爲  
樂好吹笛多著樂章爲人傳誦南渡後士

大夫有典郡之榮者不及也正大末召爲  
禮部尚書卒爲侍御時與余先子同臺爲  
禮部時余始一識也爲人寬厚有君子之  
風

試院中呈同官崔伯善李順之

睡起松陰鳥雀譁忽驚霜果墮檐牙簡書迫促全  
疎酒眼力眇昏只費茶不學道人食栢葉却隨舉  
子踏槐花提衡文字非吾事崔李風流有故家

侯相浪溪歲寒堂

靜中臺榭隔紅塵水色山光日日新不用沿溪種  
松竹主人元是歲寒人

捕蝗感草蟲有作二首

雖是形模不苦爭汝能傷稼我能鳴誰知竟有長  
平禍玉石填來共一坑

草蟲悲咽不能言亂逐螟蝗瘞古原水底癡龍正

貪睡甕中蝎虎更銜冤

二詩疑圍城中作  
觀者可以意推之

嵩山承天谷又云逍遙谷

煙霞直上逍遙谷路轉山腰咫尺迷已覺洞天分  
聖境更疑石磴是仙梯霜添紅葉黃花好天與金

壺玉柱齊

兩峯名

醉倚西風正南望莫雲烟草一時

低

弔同年楊禮部之美

海內文章選人中道德師爭教衰病足不到鳳皇  
池

李坊州芳 一首

芳字執剛大興人承安二年進士歷乾坊  
兩州刺史同知都轉運使事為人敬賢下  
士歎曲周至聞人一善極口稱道士論以  
此歸之又精於吏事累以廉能進秩正大  
未致仕歿於洛陽之難

留別

祿食媿踰量智困念歸愚符竹恒為累幸及引年

全金詩卷三十一  
三  
初驅馬國西門初服返田廬金閨富才彥絕足馱  
高衢眷我謝朝蹟冠蓋寵歸途歸途豈不榮顧瞻  
亦踟躕煌煌丹山鳳覽德萃清都行人得棲止老  
鶴青天孤石樓俯清伊旁有幽人居儻逢經過便  
山水足相娛

御訂全金詩增補中州集卷三十九

金元好問原本

劉鄩縣昂 三首

昂字次霄濟南人承安五年進士調鄩縣  
令劉光甫曾爲同官稱次霄高材博學詩  
時有佳句云

全金詩卷三十九  
補歸潛志劉昂次霄濟南人有才譽以先  
有劉昂之昂故號小劉之昂泰和南征作  
樂章一闕上平西爲時所傳其詞蠆鉞極  
蟾臂展敢盟寒視洞庭彭蠡狂瀾天兵小  
試萬蹄一飲楚江乾捷書飛上九重天春  
滿長安舜明文唐日月周禮樂漢衣冠洗  
五川煙瘴江山全蜀下也劔關何用一泥  
丸有人傳信日邊來都護先還終鄒平令

零口早行

馬上兀殘夢沉沉天向晨行雲如妬月古道不逢  
人野曠耕聲遠山高露氣新哦詩無好語聊爾一  
吟呻

讀三國志二首

虎視鯨吞卒未休一時人物盡風流翁正得黃  
承彥兒子當如孫仲謀乳臭蒙孫真寄坐齒寒鄰  
國莫分憂阿瞞狐媚無多罪誰作桓文得到頭

泣漢遺黎血未乾繁昌新築受終壇  
天球寶鼎私臧獲坎井均堂局鳳鸞  
地易主賔窮赤壁勢成螳雀事烏丸  
陳言袞袞令人厭枉就輸棋覆舊盤

錦峰王仲元 三首

仲元字清卿平陰人承安中進士以能書  
名天下歷京兆轉運司幕官子公茂今在  
雲中

**補**歸潛志王府判仲元字清卿東平人廣  
道先生之孫也工書法趙黃山自號錦峰  
老人卒於京兆幕

**附**楊奐錦峰王先生墓表先生姓王氏諱

仲元字清卿家平陰廣道先生之猶子明道先生之子世以儒道著一時名公鉅人若党懷英趙沨皆師尊之先生舉進士有聲承安五年四舉推恩資高雅清苦寡言笑無雜賓嘗知阿干縣憲司以簡靜聞退食擁琴書不出正襟危坐似與世相忘也遇會心者雖對談竟日未聞涉貴游可喜事人信其爲古君子也而書名尤重小楷

介歐虞間用薦者召應奉翰林文字同進士入玉堂自先生始改陝西東路轉運司鹽鐵判官適書藍田山碑飲玉漿偶得疾卒於官舍貞祐四年也卒之日家無餘貲藁葬城南鴈塔之陰隣永平王尚書擴墓經兵寺宇度盪荆棘埋沒迷所在後三十八年尚書子元卿至審其墓西十五步初元卿許並負而東旣而恐親族零落無可



歸甲寅五月九日奉天楊奐感念平素會  
長安邳邦用楊天德來獻臣同德張琚高  
唐趙安世析津張儆燕南毛居仁耿都陳  
及雲中孟攀鱗太華郭時中鄆郊范文炳  
平陸貞擇加以衣衾藏之故穴蓋有待也

雪中同周臣內翰賦

天上瑞花散不收温温叶氣浹皇州橫溪月澹梅  
宜臘平野風閒麥有秋清興雅高東武會孤吟誰

似灞陵游西山玉立三千丈好句都輸趙倚樓

雪

初稀時拂拂稍密自紛紛老樹曉迷月瘦峯寒帖  
雲色從空際得聲向靜中聞客枕清無夢哦詩徹  
夜分

贈青柯平隱者

太華神明觀青柯小有天大哉霄壤內無此弟昆  
賢齊物三千行棲雲二百年初平初起後又得兩

臞仙

Blank space for the poem's text.

盧宜陽洵 一首

洵字仁甫高平人李承旨致美見所存上  
 梁文勉使就舉六十一歲呂造榜登科歷  
 河南府教授河陽丞宜陽令致仕後居伊  
 陽年八十三卒仁甫有詩學以鞏原及赤  
 壁圖詩著名招飲云南園仙杏猩紅破北  
 渚官醪玉汗醇已約尊前成二老全勝月  
 下作三人

白溝

白沙清淺不容舟  
遼宋封疆限此溝  
到了山河無定主  
碧波依舊只東流

刁涇州白 二首

白字晉卿信都人  
呂造勗乙科歷涇州幕  
官入補省掾卒作詩極致力樂府尤有風  
調今散失不復見矣

渭水

渭水秋天白  
驪山晚照紅  
行人迷古道  
老馬識新豐  
霜雪滿歸鬢  
乾坤猶轉蓬  
愁來成獨酌  
醉袖障西風

物質

物質方圓定營營止自疲鶴鳧傷斷續鵬鷃失高  
卑巧宦多成拙徐行未必遲可憐箏上鴈來往聽  
人移

送花

縱橫詩酒少年曾老矣追懽謝不能種出好花無  
用處東鄰乞與坐禪僧

劉戶部光謙一首

光謙字達卿瀋州人父澤字潤之爲部掾  
斷獄有陰德劉之昂與之酬唱其詩有云  
侯門舊說炎如火陋巷今猶冷似冰半夜  
杯槃長袖舞白頭書冊短檠燈用是人不  
敢以府史待之達卿泰和三年進士資幹  
局處事詳雅爲朝廷所知累官司農少卿  
病瘡許州宣宗勅國醫診視之卒年五十

金鑑詩卷三十九  
六好問爲舉子時識於登封相得甚歡樽  
酒談笑有味使人不能忘也

寄陳正叔雷希顏

東南形勝古徐州人物休評第幾流  
落落陳雷天下士故應連榻臥黃樓

毛提舉端卿一首

端卿字飛卿彭城人父矩桓州軍事判官  
歿王事飛卿二十歲始知讀書游學齊魯  
閒備極艱苦飢凍疾病不以廢業凡十年  
以經義魁東平泰和三年擢第累遷提舉  
權貨司戶部員外郎性剛明疾惡過甚坐  
與監察御史相可否爲所中傷降鄭州司  
候改孟津丞將復用矣會卒子思適今居

東平

題崞縣郝子玉此君軒

桂林名姓一枝新萬竹青青德有鄰  
渭上風烟分別派山陽詩酒屬閒人  
心期已到冰霜窟眼界不知花柳塵  
萱背從今看輝映嫩香新粉四時春

康司農錫一首

錫字伯祿寧晉人其祖嘗與兄弟分財他  
田宅無所問止取南中生口十餘人縱爲  
民而已以故家獨貧父奕爲里胥性純篤  
縣令者倚之以納賄及令爲御史所劾奕  
自念言直則令被罪終世不齒渠官長而  
我以事證之何以立於世乃自縊而死令  
竟以無迹可尋獲免伯祿旣養於外祖田

年錄詩卷三十一  
氏田氏見伯祿骨骼異他兒謂當有望使  
之應童子舉飲食臥起躬自調護備極勞  
苦得解赴都一日日莫行菱葦中懼爲同  
行所遺至背負伯祿而行及長師栢鄉王  
翰周輔東修不能備周輔與諸公共賙給  
之黃裳榜擢第歷櫟陽簿警巡判官辟彭  
原令補省掾考滿遷開封府判官拜監察  
御史言宰相侯摯師安石非相材提點近

侍局宗室安之聲勢焯焯請託公行不可  
使久在禁近朝議偉之選授右司都事京  
南路司農丞破上蔡諸縣羣不逞把持之  
黨以河中治中充行六部郎中從軍城陷  
投水死伯祿孝於母友於其弟有恩義於  
朋友從政則死心以奉公爲民古所謂公  
家之利知無不爲者惟伯祿爲然同年生  
如雷希顏冀京父宋飛卿之等名士數十

金言卷三十九  
人世以比唐日龍虎榜至論氣質尚以伯  
祿爲稱首云

**補**歸潛志康司農錫字伯祿趙州人與雷  
希顏冀京父同年進士正大初由省掾拜  
監察御史上章言點檢完顏撒合輩預政  
非宜又京宿帥紇石列牙虎帶太恣橫不  
法時二人權勢赫然伯祿皆不屑士論稱  
焉後爲河南路司農少卿再授河中帥府

經歷官北兵陷河中帥率兵南奔濟河船  
敗死爲人重厚有爲頗讀書嘗賦打毬詩  
云高飛遠走偶然爾坎止流行知所之余  
先子云亦有理也

按部南陽有贈

魯山佳政霑鄰邑白水歡謠見路人縣務清談君  
自了農郊夙駕我何勤星河直上冰輪轉桃李前  
頭玉樹春海宇疲民望他日草堂那得遽移文



張戶部德直一首

德直字伯直平陽人叔祖邦彥字彥才張  
楫榜登科以當川令致仕有松堂集行於  
世嘗有詩云青山淡淡水溶溶盡出蒼祇  
點化工無限燒痕渾綠染可憐高木待春  
風父廸祿字仲英明昌初進士歷岐山上  
黨二縣令卒於省掾伯直貞祐三年進士  
釋褐新平簿辟藍田令秩滿父老詣行臺

留再任去之日爲立生祠移沔池通許召  
補省掾選授右警巡使終於同知武勝軍  
節度使事子城今居永寧

叔能見過

度嶺千峰闊  
沿溪一徑微  
山寒花發晚  
村迥客來稀  
強飲酬佳節  
悲歌送夕暉  
平生愛歡聚  
衰病與心違

馮辰 一首

辰字駕之臨潼人貞祐三年進士辟涇陽  
令九歲知作詩

雨後 時年十三

東風花外錦鳩啼  
喚起西山雨  
一犁綠滿蔬畦人  
不到桔槔閒  
立夕陽低

王世昌 二首

世昌字慶長寧州人貞祐三年同進士出  
身以信都丞致仕

過華州

拔地三峰冷翠微落崖飛瀑噴珠璣吟鞭落托騎  
驢過戰刃韜藏牧馬歸十丈玉蓮秋不謝半楞掌  
月晝還飛地靈人傑無遺逸未分蟠螭老布衣

方城東寺海棠

全金言卷三十九  
苦苣如針草有芒桃花輕薄絮顛狂少陵例有詩  
沾丐只枉無言到海棠

李宜陽過庭 一首

過庭字庭訓武亭人貞祐二年進士歷宜  
陽永寧滎陽三縣令所去見思入爲右曹  
掾斷獄寬平當妖賊李亨首坐所註誤數  
百人皆從輕法正大中擢右三部司正終  
於昌武軍節度副使少日從太原王正之  
學故詩文皆有可觀人初與交者皆不能  
合久之知其爲淳質長厚人也壬寅四月

暴卒於東平子萼字華甫

讀公孫弘傳

古來好客數平津我道真龍未必真一箇仲舒容  
不得不知開閣爲何人

田錫 二首

錫字永錫宛平人興定五年進士調新蔡  
主簿閒居南陽驥立山下資豪爽自少日  
有聲場屋閒作詩甚多弔蘇墳一篇有英  
靈還却睂山秀依舊東風草木天之句世  
間傳之

**補**歸潛志田永錫義州人叔思敬耀卿名  
進士永錫少有詩聲其過東坡詩云富貴

全金詩卷三十一  
十七

一場春夜夢文章萬斛冷雲泉英魂返却  
眉山秀依舊春風草木天為人傳誦興定  
末同余試南京擢第遭亂南奔在江淮閒  
病卒

牧牛圖

干戈擾擾徧中州挽粟車行似水流何日承平如  
畫裏短蓑長笛一川秋

故縣別業

印

張介一首

介字介夫彭城人正大元年經義第一人  
歷鞏穀熟二縣令幼有賦聲爲人有蘊籍  
嘗贈詩人楊叔能末章云我貧自救如沃  
焦君來過我亦何聊爲君欲寫貧士歎才  
思殊減荒村謠楊初以荒村謠得名故云  
讀天寶遺事

不但昨非今亦非上皇騎馬淚沾衣曲江死後無

忠諫却憶詞人秋鴈飛

龐漢

一首

漢字茂弘平晉人正大末年進士沉毅有  
志節待次內鄉北山兵亂遇害

終南谿

冷雲低壓萬長楊十頃秋陰鎖北堂門外兵塵漲  
秦楚水邊煙景似湖湘荷翻山雨僧窓晚竹汎溪  
風客枕涼早晚初平遂真隱遶陂閒牧石頭羊



宋景蕭 二首

景蕭字望之濟川族孫正大六年進士辟  
令泰安未赴遭亂望之於劉景玄爲外兄  
故其詩頗獲沾丐嘗有荒山銷盡古今魂  
之句詩家稱焉

河陽望河朔感寓一首

南來邊報日駸駸思禹亭高淚滿襟野燒爲誰留  
白草荒城空自隔疎林鴈聲不斷天連水山色無

金言卷三十九  
三  
情古又今離合興亡只如此往年爭識少陵心

春雪用上官明之韻

噠噠春蟲鬧撲窓地爐茶鼎蚓聲長詩中有味清  
於酒只欠冰梢數點香

李警院天翼

二首

天翼字輔之固安人貞祐二年進士歷滎  
陽長社開封三縣令所在有治聲遷右警  
巡使汴梁既下僑寓聊城落薄失次無以  
爲資辟濟南漕司從事方鑿圓柄了不與  
世合衆口媒孽竟罹非命輔之材具甚美  
且有志於學與人交欵曲周密久而愈厚  
死之日天下識與不識皆爲流涕予謂天

道悠遠良不可知而天理之在人心者亦  
自不泯也

還家三首

幽花雜草滿城頭華屋唯殘土一丘鄉社舊人何  
處在語音強半是陳州

牡丹樹下影堂前幾醉春風穀雨天二十六年渾  
一夢堂空樹老我華顛

殊音異服不相親獨倚荒城淚滿襟祇有青山淡

相對似憐我是此鄉人

劉神童微 一首

微字伯祥益都人七歲能文道陵召入宮  
賦鳳凰來儀二首稱旨賜經童出身係籍  
太學後登貞祐二年第

春柳應制得城字

翠細圓勻綠線輕著行排立弄新晴更看三月春  
風裏散作飛花滿鳳城

**附**金史選舉志明昌元年益都府神童子

劉住兒年十一歲能詩賦誦大小六經所  
書行草頗有法孝行夙成乞依宋童子李  
淑賜出身且加以恩詔上名至內殿試鳳  
凰來儀魚在藻詩又令賦旱詩上嘉之賜  
本科出身給錢粟官舍令肄業太學

**附**莊靖集王翼字輔之性穎悟勤於學七  
歲常從師行有誦杜牧之華清宮詩後師  
舉似歷歷能道之師頗奇焉八歲能屬文

既長日記千言應進士舉因感疾遂留意  
於醫尤精於易占無不應於秀老德老二  
人處悟禪理太原公處精術數誦古今才  
人詩得句法自著有古律詩三百餘篇長  
短句二百首

**附**金蓮正宗記張神童馬丹陽詩云海上  
文章第一儒重陽曾向醉中扶古今多少  
修真者應比先生一箇無

郭宣道 一首

宣道字德明邢州人系出衣冠家人物楚  
楚而有老成之風貞祐中客南陽名士定  
興張履坦之罷鄧州觀察閒居此縣之石  
橋見德明愛之招致門下飲食教督委曲  
周備遂有聲場屋閒正大末沒兵中

送同舍張耀卿補掾中臺

摩雲頭角看昂藏意外升沉豈易量取士皆知有

全金詩卷三十九  
科舉進身初不在文章關心鴈塔功名晚試手烏  
臺歲月忙此去一官先有路獨憐燈火夜窓涼

張仲宣 二首

仲宣字利夫相州人舉進士有聲子柔字  
子友今在林慮

下第

主司頭腦舊冬烘更著書郎骨相窮曉賦得官何  
足道直須遮馬困吳融

戲題石鹿蜂猴畫卷

橫槊將軍馬足塵判花學士筆頭春功名果屬丹

青手造物如何戲得人

胡汲一首

汲字直卿衛州人少有賦聲與新鄭傅伯  
祥呂鵬舉相友善貌寢陋而滑稽無窮時  
命不偶竟窮悴而死

失題

休笑參軍靴不襪休嗟門客食無魚燕鴻來去端  
誰使鵬鷁逍遙本自如潦倒淵明三徑菊荒唐惠  
子五車書古人淡裏求真味身外紛華不羨渠



王修齡 一首

修齡字紹先同州人詩有得意好花開早  
落喚愁芳草燒還生閒閒愛而戲之目爲  
癡仙人

黃葉行送祖唐臣歸拓縣

送君黃葉山黃葉紛不埽上有蕭蕭之風樹下有  
漫漫之衰草山中黃葉行復青髀肉一消人自老  
酒盡意不盡執手臨古道古道連延走錦襄錦襄

日莫浮雲翔一燈孤館相思處寒鴈一聲秋夜長

御訂全金詩增補中州集卷四十

金元好問原本

張參議澄 四首

澄字之純別字仲經本出遼東烏惹族國  
初遷之隆安祖黃縣府君移官洛水因家  
焉之純早孤能自樹立避地洛西率資無

旬日計而泰然以閉戶讀書爲業嘗從辛  
敬之趙宜之講學故詩文皆有律度兵後  
居東平詩名籍甚如云齊客計窮思蹈海  
杞人癡絕謾憂天壞壁粘蝸艱國步荒池  
漂蟻失軍容此類甚多

**附**元好問張仲經詩集序仲經出龍山貴  
族少日隨宦濟南從名士劉少宣問學客  
居永寧永寧有趙宜之辛敬之劉景玄其

人皆天下之選而仲經師友之故蚤以詩  
文見稱及予官西南仲經偕杜仲梁麻信  
之高信卿康仲寧挈家就予內鄉時劉內  
翰光甫方解鄧州俸日得相從文字間仲  
經之所成就又非洛西時比矣北渡後薄  
游東平謁先行臺嚴公一見卽被賞識待  
以師賓之禮授館於長清之別墅積十餘  
年得致力文史以詩爲專門之學此其出

處之大畧也今觀其詩永寧王趙幽居云  
寒盡陰崖草有芽行稍殘雪墮冰花號空  
老木風纔定倒影荒山日又斜天地悠悠  
常作客干戈擾擾漫思家烟村寂寞無人  
語獨倚寒藤數暮鴉其落筆不凡類如此  
及來內鄉嘗阻雨板橋張主簿草堂同賦  
浙江觀漲詩仲經云一雨天地來濤聲破  
清曉光甫大加賞嘆以爲有前人風調是

年出居縣西南白鹿原名所居爲行齋取  
素貧賤行乎貧賤之義行齋之南有菊水  
湍流噴薄景氣古澹陽崖回抱綠莎盈尺  
臘月紅梅盛開諸公藉草而坐嘉肴旨酒  
嘯咏彌日仲經有詩云寒客遠峯猶帶雪  
煖私幽圃已多花仲梁雖有煖散春泉百  
汨流之句亦自以爲不及也其餘如次韻  
見及云長松偃蹇千年物病鶴摧頽萬里

心春思云一春常作客連日苦多風野樹  
淒迷綠簷花暗澹紅愁隨詩卷積囊與酒  
樽空巢燕如相識頻來草舍中書事云故  
國三年夢新愁兩鬢蓬淚從南望盡塗自  
北來窮破牖蠅烘日枯梢鵲愛風悵然搔  
白首遠目過歸鴻贈負善卿云詩材雖滿  
腹家具少於車珍珠泉感舊云紅槿有情  
依壞砌綠莎隨意上寒廳秋興云壞壁粘

蝸艱國步荒池漂蟻失軍容秋日云寒花  
矜晚色病葉怯秋聲憶永寧舊遊寄魏內  
翰云上閣寺高迎晚翠游家樓小簇春紅  
獨脚云洛岸瀟瀟雨送春老愛青山悟靜  
緣問路前村犬吠人病枕偏宜夜雨聲林  
深鹿近人年衰與杖宜雲出祇園雨亦香  
又如風琴一首回軍謠四首清明日陪諸  
公讌集東園一首病中一首移居學東坡

八首再到方山絕句書陶詩後集句往往  
傳在人口內相文獻楊公有言文章天地  
中和之氣太過爲荒唐不及爲滅裂仲經  
所得雍容和緩道所欲言者而止其亦得  
中和之氣者歟爲人資稟樂易恬於進取  
進退容止皆有蘊籍可觀與人交重然諾  
敦分義終始可以保任使之束帶立朝當  
言責之重豈得輕負所學忘禮諫之義乎

憂世旣切惠養是其所長趙張三王鈞距  
之吏奮髯抵几砉砉俊快保其羞而不爲  
至於德讓君子之風良有望焉自丙午以  
後參幕府軍事當賢侯擁篲之敬得寸行  
寸謂當見之一日未一試而病不起矣其  
孤夢符持橘軒詩集求予編次感念平昔  
不覺出涕因題其後嗚呼有言可述學者  
之能事有子可傳人道之大本吾仲經言

可述矣子可傳矣顧雖賈志下泉其亦可  
以少慰矣夫甲寅冬至日詩友河東元某  
裕之題

積雨

積雨生頑痺新晴意自怡幽花依小徑野蔓媚疎  
籬髮少從梳懶年衰與杖宜腐儒慙用拙糲食復  
何辭

和林秋日感懷寄張丈御史二首

塞草枯黃秋未殘北風裘褐日生寒田園政憶遂  
初賦冰雪莫吟行路難囊穎露雖徒自苦蒯緱有  
劍祗空彈南窓明暖無塵到慙愧高人老鶚冠  
別家六見月牙新萬里風霜老病身塊坐氊廬心  
悄悄遠懷茅屋夢頻頻瓜田無取終成謫市虎相  
傳久是真鄉國歸程應歲莫火爐煨栗話情親

輓馬圖

飛軒棗城力亦優不應伏櫪便垂頭而今世上無

良樂兀兀黃塵輟得休

白賁 一首

賁汴人自號決壽老自上世以來至其孫  
淵俱以經學顯

客有求觀予孝經傳者感而賦詩

古人文瑩理後人但工文文工理愈暗紙扎何紛  
紛君看六藝學天葩吐奇芬詩書分體制禮樂造  
乾坤千岐更萬轍要以一理存如何臻至理當從  
踐履論跋涉經險阻鑽研閱寒溫孝弟作選鋒道



全金詩卷四十一  
德嚴中軍仰觀及俯察萬象入見聞不勞施斧鑿  
筆下生烟雲高以君唐虞下以覺斯民君如不我  
鄙時來對爐薰

王內翰樞 一首

樞字子慎良鄉人遼日登科仕國朝直史  
館

三河道中

十載歸來對故山山光依舊白雲閒不須更讀元  
通偈始信人間是夢閒

睡軒趙晦 一首

晦字光道管城人宋末代州法曹秀容主簿汴京破後不復仕自號睡軒居士子洵子都大定二十年進士真定路總管判官孫綱三赴廷試以蔭補官終於永壽令曾孫居禮之讓今在燕中

莫春

壓枝梅子半青黃葉底殘紅雨褪香翠鈿舞風榆

落莢綠鍼浮水稻抽秧酒濃猶覺春醒困睡美方  
便午夢長苦被啼鶯訴花老揮毫聊作送春忙

浚水王世賞

四首

世賞字彥功汴人與尹無忌王逸賓趙文  
孺相周旋明昌中保舉才能德行賜出身  
釋褐鞏州教授終於鹿邑簿有浚水老人  
集傳於世

立春後十日登樓

今日登樓眼風烟倍覺新溪梅初破萼屋雪半融  
銀鴈外天逾碧鷗邊水自春兒曹應見笑吟望獨

傷神

春雪

只謂春天暖寧知雪霰飛龍蛇且深蟄花柳不勝  
威糝糝凌風細紛紛帶雨稀誰當問穹昊生殺果  
何機

探梅

候得南枝破玉腮心顏今日爲君開細看苔逕無  
行跡先賞應輸我獨來

稱善齋

宦途馳逐只堪羞何意須封萬戶侯平日少游真  
可念絕勝辛苦駐壺頭

南湖靖天民 一首

天民字達卿滏陽人其父國初官原武因  
而家焉少日嘗兩魁鄉試自望者不碌碌  
所與交如龐才卿楊茂才劉之昂王逸賓  
皆一時名士晚年買田南湖葺亭圃植竹  
樹以詩酒爲事自號南湖老人年七十九  
卒子文煒德昭從孫顥子昂

西子放瓢圖

鬢髮蕭颯苧蘿秋千古香溪水自流吳越兵爭竟  
何得風流輸與五湖舟

**附**遺山集南湖先生原武人年二十許時  
曾以鄉試兩冠鄭州然其資侷儻所以自  
望者甚高終不樂爲舉子計卽棄去學擊  
刺當正隆征南頗欲馳逐戎行間旣而大  
定詔書下兵各罷歸先生抱利器而無所  
試乃浮湛里社以詩酒自娛買田南湖之

上築亭種樹徜徉乎其間盡置家事日與  
賓客酣飲歌館棊槩窮日夕不少休家故  
饒財又好施與其赴人之急猶疾痛之在  
已故人尤以此歸之所與游如臨洛王逸  
賓游宗之大定劉之昂其人皆天下名士  
至論人物必曰靖達卿今日之奇男子也  
先生生於天會初歷大定明昌泰和優游  
於太平和樂之世者五十年大安兵興乃

下世平生喜作詩樂府尤有蘊藉觀西子  
棄瓢詩可見也嘗雪中騎青驪行京水道  
中作長詩卒章有安得西都畫史吮筆出  
新意寫作南湖老子雪景乘驪圖之句其  
子文煒北渡後來東平始以先生之意追  
畫此圖求僕賦詩文煒質直好義讀書作  
文有聲時輩中觀其子可以想見先生之  
爲人故爲道其事并以致懷賢之思云

東臯桑之維

一首

之維字之才恩州人蔡丞相伯堅之子婿  
也以樂府著稱有東臯集傳於世

白髮

白髮近年見十中三兩莖半因愁僂出多爲病添  
成梳裏有時落鑷餘還又生老知無可避何處是  
功名

二十六

步元舉 一首

元舉關中人

下第過榆次

栖遲零落未歸人已坐無成更坐貧意氣敢論題  
柱客晨昏多負倚門親囊空漸覺錢餘貫衣敝翻  
饒蝨滿身遙望秦關獨惆悵一天風雨落花春



馮文叔 一首

文叔遼東人

客舍

禿襟袖褐破書囊十五年來客異鄉生事竄中搖  
虎尾窮途天上轉羊腸三朝不遇馮唐老半夜悲  
歌甯戚狂獨倚牛車望遼海西風塵土鬢蒼蒼

張庭玉 一首

庭玉字子榮易縣人能日賦百篇有集行  
於世

卽事

烏鳶繞樹山梨熟蝴蝶穿花木槿開赤脚城頭借  
書去蒼頭原上負薪來

宗道 一首

道字雲叟山陰人以足疾不仕有詩云家  
藏千卷富身得一生閒茅屋經年補柴門  
盡日關其自處可見

寶巖僧舍

寂寂鐘魚柏滿軒午風輕颺煮茶烟西堂竟日無  
人到只許山人借榻眠

鮮于溥 三首

溥字彥仁宋文臣子駿之後高祖淳淳之  
子孝標標之子壽吉壽吉之子坦皆擢進  
士第而仕亦達彥仁坦之子以門資仕終  
於櫟陽令濟源盤谷天壤佳處坦父子居  
其間飲酒賦詩翛然塵垢之外至今人以  
高士目之弟彥魯子忠厚今居鄉里

魯村道中

全金詩卷四十一  
小橋沙路已堪圖更著衰翁跨蹇驢莫靄似催寒  
日短秋容仍帶遠林疎雕盤平野黃榆落兔走橫  
岡白草枯漸喜閒身遠朝市一年強半在村墟

春日做舊詩體

年老逢春莫等閒逢春能得幾回看插花儘要花  
枝滿把酒休辭酒殘乾好向酒邊留舞袖不妨花  
外駐吟鞍聞身健在須行樂燕語鶯啼春又殘

早發

燈前夢斷家千里馬上詩成月一痕晨粥未烹官  
路遠隔林烟火是漁村

史士舉

二首

士舉字仲升滎澤人漢功臣弘肇之後高祖所賜鐵券故在其大父官濟源樂其山水因家焉父神山令激石砦榜進士仲升以蔭補官歷銅鞮三川兩縣令初任京兆錄事以歲旱擅開倉賑貧身往太一湫禱雨尋獲嘉澍用是得名爲人雅重知義理褒衣緩帶消搖山水閒宛然一老書生也

貞祐之亂避於太行保聚失守老幼皆出  
降仲升義不受辱投絕澗而死年七十九

孫庭玉字德秀今居山陽

超化

石根寒溜迸珠璣尋丈驚看雪浪飛我是玉川烟  
水客暫來盤礴亦忘歸

晉祠

小橋流水竹蕭森竹裏人家一徑深只欠東風小

籬落梅花疎淡月籠陰

御訂全金詩增補中州集卷四十一

金元好問原本

王敏夫

二首

敏夫五臺人作詩工於賦物甚爲趙宜之所稱鴈門前輩中有許蛻子遷以武皇廟詩著名又酒渴後四句云眼底恨無雲夢



澤胸中疑有沃焦山南窓花影三竿日指  
點銀瓶照病顏有集傳河東往往稱此倪  
民望字具瞻屏山所謂倪侯頭如筆其鋒  
不可當者有種松詩云種松莫種柳種柳  
莫種松堅脆非所計雅俗寧與同可是種  
松無隙地却教憔悴柳陰中張韶九成寄  
朔州苟輔臣云陳雷膠漆輕餘子楚漢風  
雲屬少年李忠直卿賦雪云不將柳絮春

風比好作梨花夜月看至於蘇吉莘老李  
鵬翼冲霄與具瞻之子仲儀詩文多可傳  
喪亂之後惜不能記憶之矣

同東巖元先生論詩

林逋仙去幾年來年驚見梅花第二篇千歲冰霜松  
骨瘦九秋風露鶴聲圓騰輝定出連城上得趣知  
從太古前邂逅茅齋話終夕只疑人世改桑田

李氏友雲樓

霧羃烟迷十二欄  
壺觴招我一躋攀  
黃簾卷起湘川竹  
分得西州數點山

王利賓 一首

利賓字茂實襄城人朴直純素作詩有古  
意似其爲人然亦未嘗以示人也家與衛  
昌叔隣居而不相往來計平生所友惟不  
肖而已予一日過襄城知茂實病就臥內  
候之乃見壁閒所黏五言古詩十數首竄  
改重疊往往可傳然後知茂實所以交予  
者特以詩故耳渠旣不言予亦無從知之

惜登時不膽寫今忘之矣

題扇頭

輕紗畫竹雀柄短不盈握暑氣正憑陵清風一何  
邈

孫益 一首

益字德裕秀容人嘗從先大夫學詩

送張安中還雲中

名保極雲  
朔名士

相送還相送臨分手重分驂  
騶欣得路鴻鴈惜離羣  
木落黃華露城低紫塞雲  
中秋月正好千里漫思君

張瓛一首

瓛字君玉大名朝城人嗜作詩年已老而  
刻苦殊未減爲人謹愿有禮見稱諸公閒  
卒年六十八子鏞鎮今居鄉里

送侯道士

十年走南北黃塵汙人衣翩翩夜啼鳥一枝無可  
依問君何所如鳧舄東南飛恨我不得往失脚穿  
與機從君知不能一笑人間非何水無蒲魚何山

無蕨薇終當拂衣去往叩雲山扉

徐好問 一首

好問字裕之永寧人

龍門

疏鑿而來道路通行人萬古翠微中南山山寺題  
詩滿一字何嘗到禹功

呂大鵬 一首

大鵬字鵬舉密縣人自言宋名相申公之  
裔宣宗頻歲南伐鵬舉作詩欲以撼主兵  
者云縫掖無由挂鐵衣劍花生澀馬空肥  
燈前草就平南策一夜江神涕泣歸其以  
氣岸自許皆此類也

夏日 北渡  
後作

旋移石枕拂藤牀細灑槐陰趁晚涼大地嗷嗷困

全金言卷四十一  
七  
爐鼎老天不肯下殘陽

高永 一首

永字信卿出於盤陽大族父元字善長教  
信卿作舉子讀書畧通卽棄之去爲人不  
顧細謹有幽并豪俠之風賓客入門則盡  
家所有者爲具不爲明日計人以此愛之  
貞祐初避兵太原與李長源居於廣平寺  
有盜穴墻而入長源性惟怯聞騷宰聲噤  
不敢語盜盡挈信卿所有而去長源徐曰

綠林之子至矣於是信卿生理大狼狽南  
渡居嵩州出入屏山之門其學遂進初名  
夔字舜卿又名揆屏山改焉真定王之奇  
士衡攻雜學屏山目爲怪魁王從之內翰  
爲賦善哭詩奉聖馬餌升公敢爲大言著  
書十萬言號北新子大畧以談兵爲主且  
曰古人兵法非不盡但未有北新子五十  
里火雨耳信卿皆與之游故其詩豪宕譎

怪不爲法度所窘有冰柱雪車風調觀咀  
龍篇及大雨後見寄可槩見矣正大壬辰  
病歿於京師年四十六

**補**歸潛志高永信卿漁陽人倜儻尚氣輕  
財好交游頗讀書喜談兵文辭豪放長於  
論事嘗從屏山遊與李長源元裕之杜仲  
梁李稚川相善屢舉不第家甚貧正大末  
余居淮陽信卿持諸公書來謁因爲定交



留月餘西去未幾同在南京被圍嘗上書  
言事不報以病死自號應庵

跋賈天升所藏段志寧山水

蒼壁雲氣湧長松風雨寒湍流劈山出玉虹飲溪  
灣胸中無雲夢筆底無江山想見破墨初布袖蛟  
龍蟠壯觀駭心魄萬象本自閒寒齋靜相對遠意  
空追攀

孫邦傑 一首

邦傑字伯英雄州容城人曾祖堅國初有  
功官至隴州刺史伯英少日住太學有時  
名所與游皆名士興定初知世將亂棄家  
爲黃冠師

**附**元好問孫伯英墓銘伯英在太學時所  
與遊皆一時名士故相程公日新判河南  
伯英居門下甚愛重之貞祐初中原受兵

全金詩卷四十一  
朝廷隔絕府治中高廷玉獻臣接納奇士  
號爲衣冠龍門大尹復與基之會有爲飛  
語者云治中結客將據河以反遂爲尹所  
構凡所與往來者如雷淵希顏王之奇士  
衡辛愿敬之俱陷大獄危有一網之禍伯  
英出入府寺人爲出死力者多故得先事  
遁去會赦乃歸貞祐丙子予自太原南渡  
故人劉昂霄景玄愛伯英介予與之交因

得過其家登壽樂堂飲酒賦詩樽俎閒談  
笑有味使人久而不厭伯英時年四十許  
困名場已久重爲世故之所摧折稍取莊  
周列禦寇之書讀之視世味益漠然矣予  
意其本出將家氣甚高已折節爲書生束  
以詩禮優柔饜飫偶以蘊籍見名其鬱鬱  
不能平者時一發見如縛虎之急一怒故  
在世已亂天下事無可爲思得毀裂冠冕

全金言卷四十一  
二  
投竄山海以高蹇自便日莫途遠倒行而  
逆施之古人或爲抱關或仕執翽或亡從  
博徒賣漿者遊其畫皆出於無聊賴之至  
耳非本志也又明年客有來崧山者云伯  
英真爲黃冠師矣正大庚寅十月十九日  
歿於亳之太清宮春秋五十有一因卽其  
地葬之始祖堅國初以軍功贈龍虎衛上  
將軍隴州刺史祖楫武畧將軍魯山令父

鈞武義將軍昌州鹽使司判官室劉氏前  
歿子璋壻同郡王好禮伯英初名邦傑後  
改天和孫氏雄州容城人居雒陽四世矣  
銘曰馬逸躑駕犢健破車霸畧所貪世議  
之拘我足天衢彼責守閭我材明堂彼求  
侏儒蚩蚩之與曹而昧昧之與居俱腐草  
木孰別以區千百載而下或有攬蓬而問  
者又焉知其輕世肆志自放於方之外以

耗壯心而老歲月歟

燒筍

煨茁舊聞山谷語勸畊還憶大蘇詩傳將火候無  
多訣留得天真又一奇未放錦襦開束縛已看玉  
版證茶毘白麻初拜驚燒尾見此應慙富貴癡

曹用之 一首

用之歸德人幼有賦聲屢中甲乙詩亦有  
功嘗戲作鬼仙語云瀏瀏竹間雨熒熒窓  
下燈相逢不相顧含淚過巴陵詩有本事  
中山楊正卿能道所以然真人作鬼語也

憶舊

花鳥巡簷喚曉晴喚來和氣滿春城春風二十年  
前客煮酒青梅也後生

趙達夫 二首

達夫太原人性嗜讀書而不事科舉南渡  
後居緱氏山中安貧守分故終世窮悴壬  
辰之兵遇害

紅梅

西湖句好已成塵蠟點都能幾許春乞與瓊兒薄  
梳洗才情留待月中人

柳

楊柳攬春不耐秋十分憔悴儘風流水邊沙際風  
烟冷收拾殘陽合莫愁

邢安國 二首

安國字仲祥沁州武鄉人少日有賦聲四十歲後卽不應科舉以詩酒自娛避亂客泌陽十餘年後北歸備極艱苦其見於詩者如此往時李長源傳仲祥柳花一詩渠甚愛之今以丹崖集校之與傳者不同當是長源曾與商畧之耶

楊花

細點輕團轉復飄隋家堤岸壩陵橋非綿非絮寒  
無用如雪如霜暖不消狂惹客衣知有恨巧尋禪  
榻故相撩陂塘回首浮萍滿依舊春風擺翠條

過唐州西李口

白沙翠竹溪上村漁家賣魚喚行人西風吹皺一  
溪水水光日影金鱗鱗

張溫 一首

溫字元佐上黨人祖仲容字才翁宋末登  
科仕至屯田員外郎以好士名天下致仕  
後有詩云病身衰退謝明朝北洞閒眠晝  
寂寥十畝晚禾烟冉冉一林脩竹雨瀟瀟  
黑花遮眼秋不落白雪撲頭春未消世事  
悠悠吾老矣一壺濁酒且逍遙至今爲鄉  
里所傳元佐泰和六年李演榜乙科登第

全金言卷四十一  
詩樂府俱有名於時

感懷一首

彌月不出門出門沙漲東風昏老樹擺撼轟雷奔  
鬼物叫嘯山前村僑居客子驚心魂歸來繞屋尋  
蘭孫蘭孫落索靈苗髡主人醉倒老瓦盆衣袖半  
帶淋漓痕芸芸蕭艾同歸根天生天殺何怨恩糟  
牀與翁共清渾絕勝被髮叫帝閭

馬舜卿一首

舜卿名肩龍以字行宛平人先世遼大族  
有知典中府者故又號典中馬氏祖大中  
國初登科節度全錦兩州父成誼字宜之  
張楫榜登科京兆路統軍司判官舜卿在  
太學有賦聲宣宗初人有告宗室從坦殺  
人從坦字履道一時賢將帥處猜嫌之地  
人以爲必死而不敢言其寃舜卿以太學



生上書大畧謂從坦有將帥材方今人物  
無有出其右者臣一介書生無用於世願  
代從坦死留爲天子將兵書奏詔問汝與  
從坦交分厚耶舜卿對臣知有從坦從坦  
未嘗識臣從坦寃人不敢言臣以死保之  
宣宗感悟赦從坦授舜卿東平錄事委行  
臺試驗宰相侯莘公與之語不契留數月  
罷歸將渡河與排岸官紛競筐中搜得軍

馬糧料名數及利害事目疑其姦人之偵  
伺者繫歸德獄根勘適從坦至立命出之  
正大四年冬薄遊鳳翔德順州將愛申以  
書招舜卿舜卿欲往鳳翔總管以敵兵勢  
甚張吾城可恃德順不可守勸勿往舜卿  
曰愛申平生未嘗識我一見爲知己我知  
德順不可守我往必死然以知己故不得  
不死也乃舉行橐副族父明之爲死別冒

險而去既至不數日受圍城中義兵七八  
千而已州將假舜卿鳳翔總管判官守禦  
一以委之凡受攻百日食盡乃陷軍中募  
生致之不知所終時年五十三詔贈某官  
配食褒中廟舜卿年少時過襄垣題詩酒  
家壁辭氣縱橫時輩少有及者如云玉鞭  
再過長安道人面依前似花好殷勤勸我  
梨花春要看罇前玉山倒他語類此

會州道中

山腰薄雪眩朝曦未放陽和入燒痕一片長安世  
情月梨花院落幾黃昏

全金言卷四十一

十一

全金言卷四十一

十一

